

11. R 37.

DISSERTATIO INAUGURALIS MEDICA
DE
**CERTO MORTIS
IN MORBIS
PRÆSAGIO,**

Quam

ADNUENTE DIVINI NUMINIS GRATIA,
IN ILLUSTRI ACADEMIA FRIDERICIANA,
GRATIOSÆ FACULTATIS MEDICÆ CONSENSU,

PRÆSIDE

DN. FRIDERICO HOFFMANNO,
COLLEGII MEDICI DECANQ ET SENIORE,

PRO LICENTIA

Summos in arte medica honores , Jura & privilegia Do-
ctoralia capessendi,

d. XVI. MART. MDCCXX.

IN AUDITORIO MAJORI
HORIS ANTE ET POMERIDIANIS,

Publicæ Eruditorum disquisitioni submittit

ELIAS MATTHIÆ,

PEWESIN. MESO - MARCH.

HALAE MAGDEBURGICAE,
Typis CHRISTIANI HENCKELII, Acad. Typogr.

PATRIÆ
PATER
ET
PRÆCEPTORIBUS,
SPECIMEN HOC INAUGURALE MEDICUM

CONSECRAT

E. MATTHÆ.



DISSERTATIO INAUGURALIS MEDICA,
DE
**CERTO MORTIS IN MOR-
BIS PRÆSAGIO.**

§. I.



Ria potissimum sunt,
quæ medicum , si officio suo re-
cte defungi velit , commendant
eumque perfectum & omnibus
fere numeris absolutum reddunt.
Primum , ut ex accurate notatis
observationibus veras morbo-
rum , quibus humanum genus adfligitur , origines &
causas evolvat atque indaget , ut morborum prīnordiis
mature opportunis auxiliis , ne in actum erumpant ,
occurrere possit , vel etiam , ut hisce cognitis salubria da-
re possit præcepta , ne homines in morbos tam facile
incident . Alterum est , ut morbos ratione genii sui &
pro differenti corporum ægrotantium natura probe co-

A 2

gnō-

gnoscat, & ad eos tollendos apta auxilia & remediorum genera inveniat. Tertium est, ut prudens de morbi eventu, vel etiam de medicamentorum operatione atque effectu judicium proferre sciatur. Quamvis autem hoc postremum non directe ad finem artis obtainendum pertineat, tamen non est dubium, quin non parum ad artis certitudinem & existimationem medici conferat. Quamobrem praecclare statim in principio *Prænotionum Hippocrates*, artis prognosticæ facile princeps, hunc in modum differit: *Medicum prænotionem adhibere optimum esse mibi videtur, prænoscens enim & prædicens apud ægrotos & præsentia & præterita & futura & quæ ipsi ægroti delinquent, exponens fidem utique fecerit, quod ægrotorum res magis cognoscatur.* Quare audebunt homines se ipsis medico committere. Hisce addenda etiam sunt, quæ Libr. II. Prædictor. Secl. III. prodidit, dum inquit: *in prædictionibus medici illius probe memores esse debent, quod si cui successerit prædictio, is apud ægrotum intelligentia præditum admiratione fuerit.* Si vero quis aberrarit, supra hoc, quod odio habetur, fortasse etiam insanire videbitur. At vero, quam excellens & divina fere hæc præfagiendi in morbis scientia est, tam difficilis, tam infida, incerta & dubia ea deprehenditur, adeo, ut non immixto judicium de morborum eventu formandum in difficultinis sit, id quod inter alia optima rerum magistra docet experientia, dum medicorum etiam peritissimi sæpius in prædicendo morbi eventu mirum falluntur, adeo, ut subinde ægrum, de cuius salute securi fuerint, interire videamus. Neque hoc diffitetur ipse *Hippocrates*, dum omnes prædictiones in morbis acutis ratione salutis &

mor-

mortis incertas pronuntiat. Atque etiam ob difficultatem hujus scientiæ inter conjecturales artem medicam viri sapientissimi & inter eos maxime medici reponere non dubitarunt, & vulgus ex incertitudine harum prædictionum non modo artem nostram incertam judicat, sed & medicos inde contemnit.

§. II.

Fatendum quidem est, vix ullam medicinæ partem tam incertam & dubiam esse, vel tantis laborare difficultatibus, quam judicatoriam, quæ a Græcis *προγνωστικὴν* vocatur; ego tamen non plane despero, fore, ut in scientiæ formam etiam hæc ipsa redigi & certis regulis universalibus sive axiomatibus, imo definitionibus firmari possit, si modo, quæ necessaria sunt ad hanc obtinendam, recta præsidia & media adhibeamus. Ante vero, quam hæc ipsa indigitemus & nobilissimam hanc materiam paulo penitus excutiamus, non alienum erit exponere primum causas, quæ impediverunt, quo minus ad scientiam hæc ars pervenire potuerit. Inter has itaque primo loco observationum defectum ponere licet; nam sicut accurate conscriptæ & completae observations & morborum historiæ primum & verum artis nostræ constituunt fundamentum, ex quibus discere & de promere licet, quid in rerum natura fiat, quinam effectus in hoc vel illo morbo producantur, & quæ mutationes in corporibus ab his vel illis rebus humanis contingent: ita etiam perfectæ & plenæ observations nobis circumstantias, materiam atque occasionem recte judicandi subministrant. Ex his igitur omnibus probe collatis medicus, judicandi non modo fa-

cultate, sed & principiis artis veris mechanico physicis & anatomicis instructus, non modo præteriorum & præsentium, sed & futurorum causas adæquatas & veras inquirit & invenit, ex quibus postea ingens periculum morbi, vel mortem ipsam, aut etiam salutem & convalescentiam optime prædicere poterit. Cum vero veteres non ex integris morborum historiis & observationibus, sed salem ex paucis circumstantiis suas regulas prognosticas, quarum maxima copia in *Hippocratis* & aliorum, qui ejus vestigia sequuntur, monumentis reperitur, deduxerint, non mirum est, eas rarius respondere, sed sæpius potius fallere. Deinceps, quia veteres vera medicina rationali carebant, cum neque vitæ, neque morborum aut mortis, in quo posita sit, natum atque causam intelligerent, & structuræ corporis humani atque ex ea pendentium motuum ignarissimi essent, non poterant etiam ex observationibus, licet plenissimis, veras causas ac notas & signa futuri eventus, ratione salutis & mortis, multo minus operationis diversæ remediorum exinde convenienti modo ac ratione elicere. Ex quo utique sequitur, veteres uti ceteras, ita etiam hanc medicinæ partem mere empirice tractasse, quod ita explicandum mihi videtur: si quis e.g. febre acuta laboravit & sub his vel illis symptomatibus mortuus est, idque aliquot vicibus observavit, statim inde formarunt regulam, hæc symptomata esse mortis indicia. Quoniam autem hæc ipsa pro diversitate subjectorum, morborum, regionum, temporum, etiam morbi mirifice variant, hinc innumerabilia fere, apud veteres præsertim, consignata sunt præcepta, quæ

ta-

tamen rarius respondent, adeo, ut etiam princeps hujus artis magister, qui fuit *Hippocrates*, ob incertitudinem hujus artis tandem exclamare non veritus fuerit: *prædictiones in acutis ratione salutis & mortis admodum sunt incertæ.*

§. III.

Ut igitur nobilissima hæc de morbis divinandi scientia majorem lucem & incrementum accipiat, & cum tempore inter scientias locum inveniat, in morbi processu vel historia omnes fere ponderandæ sunt circumstantiæ. Neque enim sufficit morbum vel etiam ejus causas nosse, sed maxime omnium notitia corporis ægrotantis accurata scitu est necessaria. Multum enim refert scire ad recte judicandum, quæ ætas ægrotantis, quæ vires, quis viscerum status, qualis sanguinis & humorum sit constitutio, quis corporis habitus, quæ vitæ ratio præcesserit, quod anni tempus, firmum an imbecille sit corpus, genus nervosum an ad motuum anomalias & ad spasmos proclive sit, nec ne. Deinde etiam oportet scire, quænam morbi sint tempora, in quibus hæc vel illa pathemata aut affectiones incident. Præterea inquirendum est, qua methodo quis curatus fuerit, an error ab ægrotante vel medico commissus. Ex hisce probe cognitis demum judicium formandum est, quænam signa vel symptomata sub his vel illis circumstantiis, in hoc vel illo subiecto salutarem vel funestum habeant eventum. Accidit enim særissime, ut certum symptoma ejusdem morbi in hoc corpore lethale, in altero minime lethale sit. Ita særius videmus, infirmos, in quorum numero sunt senes, & qui morbo

præ-

præcedente, vel etiam inedia aut animi diurno affectu fracti sunt, si dolore ex calculo vel etiam colico corripiuntur, sub levissimis sæpe symptomatibus, quæ nihil periculi habere videntur, & quæ impune robusti ferunt, fatis cedere. Idem quoque observare licet in acutis passionibus, ubi sæpe, qui graciliores sunt corpore & partes exquisitius sentientes habent, in acuta febre gravissimis anxietatibus, doloribus, vigiliis cum delirio etiam junctis & vehementi siti torquentur, & tamen evadunt; quum ex adverso, qui spongiosioris sunt habitus corporis, qui viribus fracti sunt, ex eadem febre decumbentes, non adeo de incommodis quibusdam neque de ullo dolore, aut siti, aut vehementi æstu conquesti, levi accidente externa corporis refrigeratione & delirio in statu morbi moriantur. Deinceps quod attinet ad morborum tempora, utique horum consideratio multum confert magnamque vim habet ad phænomena in morbis dijudicanda. Ita notum est, epilepsiam sæpiissime, præsertim in ætate infantili, variolarum initii sine omni periculo & noxa accedere, cum tamen hic affectus in vigore morbi funestum certissime declareret evenitum. In eodem variolarum morbo inter initia phrenitis sæpius in juvenili corpore observatur omni vacans periculo. Quodsi vero circa nonum vel undecimum diem infestat, in propinquuo mortem esse significat. Atque ideo probe omnia sunt in prognosi secernenda, distinguenda, ponderanda. Quare sapientissimum est monitum illud Hippocratis, quod extat *Liber. Prædictor. II.* §. 3. consulo, ut medici quam prudenter agant, tum in reliqua arte, tum in hujusmodi prædictionibus. Nam certe medi-

medicus nulla re turpius, quam ejusmodi vanis & temerariis vaticiniis, voculas hominum incurrit, vel apud vulgus in contemtionem adducitur, præsertim, si quis ceu moribundus deseritur a medicis & postea convalescit, vel si spes frustratur & moritur quidam, de quo medicus plane fuit antea securus. Novi medicos, qui juramento confirmarunt, ægros non morituros, qui tam elapsis aliquot horis extincti fuerunt.

§. IV.

Igitur ego sum hac in sententia, utut prognosticandi ars valde difficilis sit, maxime omnium tamen esse laborandum medico, ut certa aliqua signa & notas futuræ mortis cognoscat, id quod etiam obtineri posse non despero. Nam illud negari nullo modo potest, omnes eventus, sive ad salutem seu mortem spectent, a certis & adæquatis & proportionatis causis proficiisci, neque sine iis fieri posse. Quod si itaque causas, cur homo per morbum mori necessario debeat, probe noscat, earumque causarum indicia, quibus se manifestare debent, in ægrotante probe observet, nullum est dubium, quin ex eorum præsentia futurum eventum prævidere possit. Simili ratione si quis probe sciat medicus, quo modo, quo tempore, quibus viis aut excretionibus morbus solvatur & homo ad sanitatem perveniat, utique ex iis præsentibus confidenter nec sine certa ratione salutem futuram conjicere poterit. Hisce positis jam statim præeximum illud monitum adjungere licet, quam perverse ii agant medici, qui antequam satis certas futuræ salutis vel mortis habeant vel habere possint notas, nimis temere & inconsiderate statim inter initia

B

vel

vel progressu morbi judicium de ejus eventu interponunt. Nam, si ullum quid, certe hoc fallit, a morbi nempe principio ad ejus finem non esse firmum judicium ferendum. Sæpe enim lenissime morbus incipit & mitissime videtur procedere, sed si ad statum pervenit, brevi omnia in pejus ruunt.

§. V.

Ego itaque, cum specimen eruditionis meæ edendum esset, in prælenti exemplum artis prognosticæ rationalis exhibere constitui, dum certas ex observationibus plenis & luculentis & vera mortis theoria elicitas regulas proponam, quarum adlicatione medicus probe scire possit, an morbus, quem suscepit curandum, lethalis sit, nec ne, si nimirum commodum judicandi tempus adfuerit. Adsit vero nostris laboribus divinum numen, eosque secundet quam benignissime.

§. VI.

Illud vero, antequam ulterius progrediamur, sciendum est, minime hanc mentem esse nostram, ac si medicus, ineunte vel progrediente morbo, ejus eventum ratione salutis & mortis prænoscere possit, quod vulgus putat & subinde judicium a medico hac dere postulat; sed hoc urgemos & intellectum volumus, dari certas notas atque indicia, quibus tum in acutis, tum in chronicis passionibus funestum eventum prævidere & declarare possumus, ut vero hoc præstemus, expectanda esse illa tempora, quibus haec indicia te prodant. Deinde quoque aliud est morbum, num multum habeat periculi, declarare, aliud est, mortem sequuturam prædicere. Illud quidem ex ægrotantis natura & viribus morbique genio

genio vel in principio statim conjicere licet; hoc vero non certo prænuntiare possumus, nisi vera mortis indicia præsto sint. Quænam vero sint illa, de quibus certi & securi esse possumus, futuræ mortis in quovis magno & dubiæ spei morbo indicia, illud nobis jam excutiendum est. Priusquam vero illud adgrediamur, non alienum, sed maxime è re erit, mortis theoriam ejusque veras causas paulo accuratius evolvere, quo postea eo melius ratio eorum, quæ dicturi sumus, apparet.

§. VII.

Veteres uti solidis ratiociniis in re medica prorsus destituti erant, ita certe inanis esset labor, si quis ex eorum monumentis discere vellet, in quonam mortis natura atque essentia posita sit. Nam illi nihil aliud adferunt, quam quod vita in calidi innati & humidi radicalis temperamentum, mors vero in extinctione horum consistat. Verum cum hæc nihil nisi obscurum conceptum in mente humana relinquant, certe nihil circa præsens negotium solidi exinde vel demonstrari vel inveniri potest. Postquam vero nostris temporibus per rerum naturæ studium ac contemplationem, neque minus per solertissimam corporis humani beneficio anatomæ structuræ indagationem, disciplinæ medicæ maxima lux accessit, & nobilissimum, imo divinum illud circulationis sanguinis inventum manifestatum fuit, vitæ & mortis rationem non amplius in obscuro esse positam clarissime intelligitur. Nam quemadmodum perenni & libero sanguinis & humorum circuitu corpus, putredini alias in se & sua natura valde obnoxium,

225

xium, ab omni corruptione vindicatur & integrum durat, omnesque actiones tam naturales, quam animales salvæ permanent, robur quoque tam animo, quam corpori præsto est: ita circulo illo penitus destructo non modo omnes & animi & corporis vires perire eorumque functiones omnes cessare & corpus protinus in putredinem ruere animadvertisimus. Ex quo intelligitur, mortem tunc adesse, & recte propuntiari de corpore, si fluidorum progressivus ille & in circulum abiens motus ita extinctus est, ut nulla arte vel ratione amplius revocari possit. Sicuti vero ille fluidorum circuitus a cordis, arteriarum & omnium canalium, qui fibris nerveis motricibus instructi sunt, motu, impulsu & tono dependet; ita etiam mortis caula non aliunde, quam a cordis & arteriarum pulsu, neque minus a thoracis motu sive respiratione penitus destruxta derivanda est. Quomodo vero ille motus in morbis & a morbis ex toto intercipiatur, illud jam venit explicandum.

§. VIII.

Quemadmodum itaque morborum propria sedes, ita etiam mortis causa non rectius, quam ab arte anatomica, sive accurata inspectione corporum morte extintorum, petenda est. Jam vero, si corpora, morbo quocunque etiam extinta, anatomico cultro subjicimus, statim evidentes mortis causæ & sensibus & intellectui se se manifestant. Nam sive quis ex morbo acuto sive ex chronicō fuerit mortuus, semper partis cuiusdam corruptio quædam putredinosa, cum ingenti foetore juncta, in conspectum venit. Vel enim semper & ubique in nobiliori quadam parte interna, sive in ventriculo

lo & intellinis, sive intra cerebrum ejusque membranas, sive in hepate, utero, renibus, liene aut pulmonibus, corruptio quedam putrida & sphacelosa offendit, quæ naribus vix tolerabilis est, & hæc ipsa vel ex sanguinis stasi sive inflammatione, quæ mortem in acutis ingenerat, vel ex stagnatione aut extravasatione sanguinis & humorum in præcipuis cavitatibus, capite videlicet, thorace aut abdomen, enata deprehenditur; quod ultimum maxime fit in morbis chronicis, ubi viscera præfertim in thorace ac abdomen aut pure aut sero extravasato corrupta conspicuntur. Nunquam enim disseccatio corporum fit ex gravi quodam capitum morbo, v. g. apoplexia, epilepsia, lethargo defunctionum, ubi non vel sanguinis vel seri in cerebro extravasationem, vel etiam stasis sanguinis inflammatoriam & sphacelosam in meningibus videre licet. Idem animadvertisimus, si ex gravissimo pectoris morbo quis diem suum obiit. Nam in pleurite profunda & peripneumonia tota pulmonum vasculosa compages sanguine corrupto infarcta & obstructa est. Si quis ex phthisi perit, pulmo vel purulentis tuberculis obsessus, vel ejus major pars pure corrupta & exesa deprehenditur. In convulsivo asthmate ordinario ingens collectio aquarum in thorace finem vita facit, inque catarrho, qui subito jugulat, suffocativo in pulmonum bronchiis vel seri vel sanguinis collectio, aëris liberum egressum & ingressum impediens, reperitur. Si quis vero mortis causas in morbis chronicis, qui sedem & domicilium in abdomen suum fixum habent, perscrutari velit, is semper in cachexia & hydrope induratum vel corruptum hepar & omentum

B 3

cum

275
cum magna extravasatione feri inveniet. In morbo sic dicto nigro Hippocratis valde funesto lien utplurimum magnum , infarctum & corruptum , neque minus extravasatio sanguinis in ventriculi atque intestini ilei cavitate conspicitur. In passione iliaca pene mortifera, in atrocissima colica , cholera, dysenteria , cardialgia lethali inflammatas , sphacelosas & erosas cum summo fœtore ventriculi ac intestinorum partes invenire licet. Quem atrox ex calculo in urethere firmius harente dolor interficit , is inflammatum maxime ventriculum habet , viis quoque & ductibus urinalibus ipsisque renibus male affectis & corruptis. In morbis uteri, qui feminas necant , ipse vel inflamatus vel exulceratus aut sphacelatus, vel extravasato sero corruptus sese conspectui offendit.

§. IX.

Quod attinet ad passiones acutas , inter quas principem locum habent febres , quæ plures mortalium in flore ætatis e medio tollunt , & vitæ humanæ inimicissimæ sunt, eæ profecto nulla alia ratione homines perimunt , quam partium internarum , præsertim ventriculi, intestinorum , meningum , inflammatione in sphacelum desinente , hæc enim nusquam non in febre enectis reperitur. Neque alia ratione vénena , cujuscunque etiam generis sint , quam sphacelosa inflammatione , quæ primas maxime vias infestat , interficiunt , quæ etiam mox dissectione facta lensus incurrit , adeo , ut hæc véneni adsumti certissimum inter alia præbeat indicium. Ubi vermes vitam tollunt , intestina identidem erosa & inflammata oculis sese offerunt. Ex quibus satis clare

ap-

244.

apparere arbitror, nunquam mortem facile contingere, nisi hæc ipsa a putredine & corruptione partis cuiusdam internæ proficiscatur, ita prorsus, ut putredo vitæ inimicissima & mortifera recte dici possit. Nam sicut vitales sanguinis motus penitus extintos totius corporis putredo certissime sequitur: ita illa ipsa etiam est plerumque adæquata, vera, ac fere perpetua mortis causa, quæ vel externas partes, quod rarius, adgreditur, vel internas, quod frequentissime fit, partes obserdet. Atque adeo vere adfirmare possumus, vix unum ex mille hominibus sine sphacelo mori. Jure enim hic excipimus eos, qui violenta morte pereunt, vel qui ex polypo, orificio vasorum claudente, subito extinguntur. In ceteris vero omnibus, si post mortem aperiuntur, corporibus fœtida putredo, nares molestissime ferens, percipitur.

§. X.

Verum enim vero quamvis mortis causas evidentes semper deprehendere liceat in defunctis & disstis corporibus, tamen sapienter hoc loco monendum esse ducimus, ne ipsas mortis causas cum morborum causis confundamus, quod sapissime contingere animadvertisimus. Nam pluribus medicis id in more positum esse video, ut, si quis ex periculo decedat morbo, corpus aperiendum esse suadeant, & quando postea internæ partes sphacelatae & corruptæ sese sistunt, hæc omnia adstantibus monstrant, & proponunt, non potuisse ob tantam læsionis vehementiam ægrum ullo modo servari, cum tamen manifesto causas mortis cum causis morbi hac ratione confundant: siquidem illud

ma-

maxime in quæstionem venire debet, annon illæ, quæ mortem produxerunt, causæ convenientibus atque in tempore adhibitis auxiliis potuissent averti. Atque ita errores suos, si quos forsan commiserunt, satis callide & astute apud ignaros tegere & occultare sciunt. Quum itaq; mortis ratio sive natura in præsentanea & putrida corruptione sita sit, sapienter hinc inferre licet, si quis servare velit ægrum, omni modo & cura laborandum esse medico, ut opportunis auxiliis & remedii corruptionem sphacelosam, quæ nunquam non a stasi & stagnatione humorum proficiscitur, præcaveat atque averat omniaque ea evitet, quæ ullo modo ad putredinem promovendam aliquid conferre possint.

§. XI.

Sed ut proprius scopum nostrum attingamus, qui in eo vertitur, ut ex indiciis & signis quibusdam futuram hanc corruptionem advertamus & prænuntiemus, evolvendæ utique sunt causæ, per quas corruptio hæc mortifera intus dignatur. Ut enim in rerum natura nullus effectus fit sine suis certis & proportionatis causis, ita etiam pro certo adfirmare licet, certas dari hujus corruptionis in morbis causas, ex quibus præsentibus ratio prognoseos rectæ demum deducenda est. Prius vero, quam meditatio nostra ad explicationem harum causarum descendat, paucis saltem placet exponere, cur putredo vitæ humanæ tam inimica sit, ut etiam levior & non adeo magna sphacelatio, in parte ventriculi vel intestinis existens, subita morte hominem perimat. Id itaque hac ratione fieri nobis videtur: vitalis ille motus & circuitus sanguinis, a quo omnium functionum

245:

num corporis integritas pendet, solidorum impulsu, robore & potentia motrice eorumque viribus sustentatur, hic autem non, ut quidam sentiunt, ab ente quodam materiali experte, sed potius a subtilissimo, quod in sanguine & nervis est, fluido ejusque influxu in has partes dependet, quod vel hoc unicum experimentum fatis luculenter confirmat, dum nervo vel arteria, quæ ad partem abit, ligata vel præcisa, omnis motus, sensus & nutritio ejus perit. Deinde quod robur & vires partium a materiali quodam principio proveniant, vel illud documento sufficienti esse potest, quod inedia non modo vires auferat, sed illâ etiam mors tandem accersatur, quid quod congruis datis alimentis vires consumtæ mox recuperentur. Jam vero in tota rerum natura nihil tam perniciosum reperitur, quod tam cito vires & robur adimat corpori, quam putredo, uti videmus in Iphacelo, in cancro exulcerato, qui brevi tempore & vires & vitam adimunt. Ecquis itaque negare ausit, intus conceptam putredinem, prælertim si sese diffundat & incrementum sumat, intime teturum suum vaporem in partes maxime nervosas & motrices fibras dispergere, qui, cum tota sua natura fluido illi, quod motus regit solidorum, adversus sit, illudque corrumpat & quasi extinguat, motus systoles & diastoles tonumque & motum fibrarum penitus aufert.

§. XII.

Igitur duplex datur in morbis iter ad mortem: alterum est nimis subitum & præceps, idque fit per videntes partium nervosarum constrictiones, quæ vel ex inflammationibus oriuntur, vel inflammatorias flasas sub-

C

inde

inde novas in morbi vigore ingenerant, ad sphacelum & mortem tendentes, quod maxime contingit in febribus & passionibus acutis; alterum est paulo lentius & successive fit ex viscerum corruptione, humorum stagnatione & extravasatione, idque præcipue in morbis sic dictis chronicis obtinet. Quod attinet ad generationem mortis in morbis acutis sive febribus, illa plerumque evenit per spasmos vehementes, qui inflammationem ventriculi vel intestinorum, aut membranarum cerebri & mortiferam corruptionem post se trahunt. Est enim spasmus naturæ humanæ & vitæ semper & ubique infensissimus, eo quod humorum & sanguinis motum a circumferentia & ambitu corporis ad interiora convertit & dirigit, & saluberrimas excretiones, quæ vitæ & sanitati patrocinantur, impedit & cohibet. Præterea spasmorum ea est potentia, ut liberum & æqualem sanguinis circuitum, in quo sanitatis ratio posita est, impedianc eumque inæqualem reddendo nimias congestiones sanguinis in nobilioribus partibus, præser-tim in capite, corde, ventriculo & intestinis efficiant, quæ si non superantur a natura per commodam discussionem & resolutionem, corruptio & mors certissime sequuntur. Nam in omni motu sic dicto naturæ sive febre duplicitis generis motus junctus occurrit, & probe attendi & a se invicem secerni debet. Alter est valde perniciosus, qui fit a circumferentia ad centrum, & hic est spasticus, semper morbosus, qui ad destructionem naturæ & motuum vitalium tendit, & frigore, rigore, horrore & pulsu parvo, debili atque anxietate sese manifestat; alter est valde salutaris, qui spasmus subsequitur & huic con-

296.

contrarius est atque a centro ad circumferentiam dirigitur , sive ab interioribus ad exteriora vergit , & calore ac pulsu celeriori & validiori se se manifestat , & hic quasi interna naturæ medicina est , corpus ab omni destruccióne vindicans , cuius beneficio exitiales illæ spasticæ partium strictræ resolvuntur , laxantur atque inflammatoriae stases discutiuntur , & tubuli excretorii antea clausi & constricti felicissime aperiuntur . Hic est ille motus , quo veteres naturam medicatricem indigitarunt , cuius ministerio morbi vincuntur , homo convalescit & mortis periculo eripitur : hic etiam est , sub quo nemo moritur , quod potius sit sub spasmo , qui ipsi est contrarius . Quicunque itaque ex medicis horum motuum sibi oppositorum , unius quidem salutaris , alterius vero perniciosi , genium , potentiam , effectus & mutuas eorum actiones & relationes probe novit atque cognoscit , is magna cum ratione & prudentia in morbis agere , sapienter pericula prædicere & faustos eventus prænuntiare optime valet , is quoque veterum phrasæologias medicas v. g. febrem esse naturæ pugnam cum morbo , & convalecentiam fieri , si natura morbum vincat , mortem vero produci , si morbus naturam supereret , per quam facile intelliget . Nam si spasmi , inflammationes , congestiones ac stases sanguinis , in se mortales , a motu calido , resolutorio , febrili , certo interposito tempore , non digeruntur ac discutiuntur , sed illæ superiores sunt , tunc utique succumbit natura , & ægrum mori oportet . Cum vero dentur certa indicia , quibus & viætria naturæ super morbum & morbi super naturam prævideri & dijudicari possit , liquido appetet , artem illam præfari di ,

C 2

di, quæ προγνωστικὴ a Græcis dicitur, certis utique niti
fundamentis.

§. XIII.

Visum itaque nobis est, effectus & indicia illa spasmodorum lethiferorum non facile fallacia in acutis hoc loco breviter strictimque exponere, quæ si circa dies sic dictos criticos, corpore a morbo debili reddito, apparent, nec evanescunt, aut incrementa sumunt, certus de sinistro morbi eventu poterit esse medicus. Neque vero exitiales hi spasni tantum in una parte, sed in pluribus fere manifestant. Igitur si rigor cum frigore circa morbi vigorem observatur, vel sæpius recurrat, si corpus non æqualiter molle, sed durum, calidum & aspernum est, si exanthemata a spasmo cutis retrocedunt vel minuuntur, si exteriora horrent & frigent, si fonticuli vel ulceræ præsentia nihil amplius humoris emitunt, indicia certe hæc sunt, quæ nihil boni portendunt, sed potius sumum periculum mortis minantur, quia propter cutis spasmos sanguinis & humorum motus versus interiora pessimas inflammatorias congestiones facile suscitat, & impedit, quo minus morbida materia perspiratione corpore possit expelli. Pergunt plerumque spasmi in acutis morbis etiam ad alia excretoria, vias nempe urinarias, alvinas, quarum constringione efficiunt, ut urina tenuis & aquosa reddatur, & alvus plane dura, tensa & occlusa sit. In quibusdam ob urgentem spasmum frequens mejendi & desideri est desiderium.

§. XIV.

§. XIV.

At vero gravius imminet periculum , si spasticæ illæ contractiones interiores & nobiliores , quæ motibus vitalibus vacant , partes infestant . Nam pulsus parvus , contractus , celer & durus , item inæqualis & intermittens non aliunde , quam a spastica & convulsa strictura nervorum , qui in cordis fibras & tunicas arteriarum desinunt , proficiscitur , & semper in statu morbi plurimum periculi ostendit . Ejusdem pessimæ notæ respiratio crebra , anxia & difficilis est , si in critica tempora incidit ; nam sicut sapientissimo Hippocratis effato in Prognosticis facile spirare magni momenti est ad salutem in omnibus morbis , ita crebra & ægra in acutis nequicquam boni unquam ostendit . Si nervos præcordiales feralis exerceat spasmus , summae anxietates , inquietudo & jaætatio corporis crebraque lecti & situs mutatio contingunt . Si idem spasmus œsophagi & ventriculi membranas nerveo musculares occupat , ad vomendum conatus , regurgitatio potionis , item seri limpidi ex fauibus non infrequens extrusio , difficultas in deglutiendo atque inexhausta fitis cum oris & linguæ ariditate se produnt , siue in consensum rapitur duodecimum , flavo colore tingitur corpus maximeque facies . Ubi vero profundior spasmus totum genus nervosum graviter concutit atque convellit , ad ultima jam ventum esse , indicio sunt nares acutæ , collapsa tempora , frigidæ languidæque aures , oculi concavi , cutis circa frontem dura & intenta , color niger aut per pallidus , quibus facies Hippocratica , certa mortis index , describitur . Deinde nervorum distensionis , quæ semper in

C 3

acu-

XAS

acutis terribilis, juxta apb. VI. secl. IV. indicia sunt, ubi æger supinus cubat, eique genua contracta sunt, ubi deorsum ad pedes subinde delabitur, ubi brachia & pedes nudat & inæqualiter dispergit, unguis digitique pallidi sunt, sique manibus floccos legit, fimbriasque diducit, vel in adjuncto pariete, si qua minuta eminent, carpit. His quoque adjungi debent subsultus tendinum, quæ omnia si apparent, in propinquuo mortem esse denunciant.

§. XV.

Quamvis vero plurimæ ex acutis internam quan-
dam partis inflammationem pro causa agnoscant, atque
ob id periculo non careant, tamen sœpissime in ipso vi-
gore & vehementia morbi inflammations novæ & qui-
dem in ventriculo, vel in membranis cerebri superveni-
re consuescunt, quæ nunquam non valde terribiles sunt
& mortis prænunciæ. Atque hæ inflammations, vel
separatæ, vel simul junctæ, non modo in malignis, pete-
chialibus, contagio infestis ac lœstrensis febribus, sed
& in aliis acutis, synochis, ardentibus, purpuraceis, va-
riolis, morbillis circa septimum, nonum vel undeci-
num diem supervenientes, certissime hominem peri-
munt. Cognoscitur vero inflammatio ventriculi ex
eo, si magnus æstus & quasi incendii sensus cum acuto
dolore circa præcordia est, & locus circumscriptus ta-
ctu durus, extrema inalgescunt, summaque anxietas &
inquietudo jungitur, sique omne, quicquid vel medi-
camenti vel potionis assumitur, vel protinus vomitu
extunditur, vel retentum summam creat molestiam au-
getque anxietatem. Quandoque tanta est inflammatio,
ut

248.

ut per œsophagum ad ipsas fauces transeat, quæ ardentibus dolorificis pustulis obſidentur, & viſcido putrido muco continuo obducuntur, quæ omnia futuræ mortis præſagia ſunt. Altera inflammatio, quæ ſepiſime huic jam dicta jungitur, & brevi ante mortem accedit, adhuc periculofior, membranarum cerebri eſt, quam Græci phrenitin vocant, & ſequitur plerumque affiduam & pertinacem vigiliam, capitisque vehementem dolorem. Eam prænunciare ſolent præcedens rigor, urinæ copioſæ & tenues, aurium tinnitus, fortis pulsatio in capite, paucæ ſanguinis ex naribus ſtilla. Ejus vero prætentia hiſ ſignis notescit: rubicundi, flammæ & truces ſunt oculi, alienatio eſt mentis, verba ſine ſenſu & ordine proferuntur, interrogati omnia aliena respondent, lacrymæ ſæpe effunduntur involuntařiæ, dentibus ſtrident & nulla amplius humidus eſt appetentia. Convulſio, ſi phrenitidem ſequitur, haud dubia significatio mortis eſt. Haec ſunt principaliores afflictiones, quæ homines in acutis jugulant. Hoc mortis genus per vehementes inflammationes & ſpasmos maxime luſtinent temperamenti ſic dicti ſanguinei, cholericici, vel ſanguineo-cholericici, ætate juvenes & viri, teneriori ſenſu prædicti, ad iram proclives, habitu corporis macilenti & conſtricti, & qui vicii valde ſpirituoso indulſerunt.

§. XVI.

Aliud genus mortis obeunt etiam in acutis & continuis febribus, qui repleti & ſpongiosi ſunt habitus corporis, phlegmatici, & qui vires vel per morbos, inedi- am aut diuturnam triftiam, vel ſanguinis profusiones

vires exhauserunt. Nam hi non tam per vehementes spasmos & gravia ac dolorifica pathemata e medio tolluntur, sed potius ex motuum imbecillitate atque defecitu partiumque atonia roboreque & viribus dejectis vitam finiunt. Atque in ejusmodi casibus stagnationes ac stases humorum ac sanguinis in putridam corruptionem statim in principio inclinant. Et hi morbi, quia lenibus incedunt symptomatibus, saepissime fallunt medicorum spem eorumque praesagia elidunt, unde etiam ob non tam evidentem, sed magis occultam perniciem difficilis sunt judicii & malignis annumerari solent. Cognoscuntur vero his indiciis: cum levi frigore & horrore oriuntur, sed summa statim inter initia virium est prostratio, pulsus languidus & frequens simulque contractus, in situ erecto facilis est animi defectio, urina tenuis & sine sedimento, nullus somnus, sed tamen ad eum perpetua inclinatio, quem etiam major virium prostratio & mentis alienatio sequitur, de nullo dolore, siti vel magna molestia conqueruntur, nihilominus valde inquieti sunt, jactantur, si que extrema algescunt & pulsus incipit desicere, neque in carpo manuum amplius percipitur, mortis in vicinia ægros esse positos rectissime colligitur. Quamvis vero & hi homines non sine inflammatione ventriculi & membranarum cerebri moriantur, tamen ea non tam gravibus spasmis & symptomatibus juncta est, sed facilis est transitus ad corruptionem.

§. XVII.

Cum vero omnes inflammations demum in necrosis sive sphacelosam corruptionem terminari soleant,

ant, non alienum videtur & hic subjungere quasdam notas, quibus transitus inflammationis in sphacelum significetur. Sunt vero hæ sequentes. Internus quidam frigoris sensus percipitur & dolor ante acutus & acerbus circa caput vel inferiores partes subito desinit, & mens antea delira ad se quodammodo redit, virium vero defectus major fit, pulsusque ex toto deficit, vel valde inæqualis, angustus & intermittens est, & alvus antea fortiter clausa se aperit vel præter voluntatem fluit, vultus fœdus ac pallens appetet, tempora, cervices & pectus gelido sudore madent & extremæ corporis partes refrigescunt & pulsus plane deficere cœpit & borborygmi ac sonitus in ventre oriuntur, & liquida immissa quando descendunt, sonum emittunt, als wenn sie in einen hohlen Topf fielen. Hæc omnia mortem præ foribus esse manifesto demonstrant, quia ob sphacelum vires sumentem summa partium atonia & extremus virium lapsus adest. Si quando sanguine nimium redundantes subito ex sphacelo interno vita decedunt, aliquot post mortem elapsis horis horrendum in modum venter intumescit, & magnæ vesicæ oriuntur, & facies plumbea ac viridis fit, intolerabilis fœtor adest, atque ex ore sæpius & naribus male olens crux stillat.

§. XVIII.

Est adhuc aliud mortis genus, quod qui ex gravibus pectoris vitiis ægrotant, subire debent, idque est suffocatio, qua pereunt & anginosi & peripnevmoniai, empyematici, catarrho suffocativo laborantes, & quos asthma convulsivum & thoracis hydrops jugulat.

D

Hi

Hi morbi non modo omnis aëris ingressum & egressum
in pulmones liberum intercipiunt, sed & sanguinis per
pulmonum vasa circuitum ex uno ventriculo ad alterum
tollunt. Nam angina, quæ musculos laryngis internos
occupat & Græcis cynanche dicitur, ubi neque in cer-
vice, neque in faucibus quicquam conspicitur vel tu-
moris vel ruboris, simul tamen summi doloris torment-
um & vehemens febris est, citissime per suffocationem
necat, tum profecto, ut verbis utar *Lommii Lib. II. Me-
dic. Observ.* oculi vertuntur & rubent & veluti iis, qui
strangulantur, prominent, vox impedita nihil significat
& qualis catulorum est, tenuis editur, os apertum hiat
frigidi aëris cupidum, ex eoque spumans saliva move-
tur, lingua exeritur; potui datus liquor per nares re-
meat, ipse æger totus inquietus est, crebro e cubili exi-
lit, tandem vero strangulatu atque syncope oppressus
perit. Ita etiam præfocatione occidit peripnevmonia,
nam si nihil plane exspuitur, sed magna adeat & anxia
spirandi difficultas atque angustia, inquietudo, sputum
intus in pectore strepit, pulsus inæqualis & intermittens
fit, & alvus infirmis jam viribus funditur, & quod tussi
rejicitur, spumosum modo cruentum, modo flavum est
& simul continua vigilia urget & phrenitis sequitur, fri-
gidique aëris hauriendi cupiditas maxima est, æger lu-
benter supinus & erectus cubat, nam in nares reclina-
tus enecari præfocatione videtur, quinto vel etiam se-
ptimo die ad summum certa mors sequitur. Qui a-
sthmate sic dicto convulsivo moriuntur, hos identidem
suffocatio perimit, quod vitium nascitur plerumque ab
hydropo thoracis, lubito per ruptas hydatides orto,
quan-

quando nimirum ingentes inundationes aquarum pondere suo diaphragmatis motum & liberam pulmonum expansionem impediunt, ut nec aër ingredi, nec sanguis opportune eos transire posit. Oritur etiam hoc malum, ubi tunica bronchiorum glandulosa interior, multis & magnis glandulis obsita, ita angustatur, ut nec spiritum in pulmonibus contentum elidi, vel novum recipi patiatur. Sæpe etiam spasmus convulsivus tam fortiter bronchia convellit & coarctat, ut strangulatione æ gri misere intereant. In omnibus hisce vitiis summa anxietas atque inquietudo, tremulaque adest spiratio, pulsus inordinatus & inæqualis, & sibilus ac strepitus in pectore percipitur, neque conquiescere uno in loco possunt, & nihil nisi spumosum quidpiam aut cruentum e pectore extunditur, tandem extremis corporis partibus inalgescentibus syncope & suffocatione pereunt. Idem fit in catarro sic dicto suffocativo, qui maxime senes, imbecillos atque infantes perimit, & plerumque à paralyssi nervorum pnevmoniaeorum nascitur. In hoc vitio identidem spiritus cum summa difficultate, angustia & anxietate trahitur, & bronchia humore a sanguine secedente replentur, & quia nihil sputi excernitur, aër admissus magnum strepitum ac sonum edit, donec tandem ex aëris defectu æger suffocetur. Certa vero mortis indicia sunt, præter hæc jam dicta, pulsus intermittens, parvus & ex toto desinens, quod sæpe aliquot horas ante mortem fit. Sæpiissime etiam mentis turbatio supervenit cum extremorum frigore. In phthisicis, ubi magna in pulmone cavitas exesa ingentem purulenti humoris copiam recipit, si ob imbecillitatem virium non

ejicitur, sed expectoratio cessat, mors brevi sequitur.

§. XIX.

Expositis iis morbis eorumque lethalibus signis, qui suffocatione necant, proximum erit, ut quosdam adhuc acutos, qui & inflammatione & vehementioribus spasmis hominem e medio tollunt, persequamur & quibus signis futura mors prævideri & prædicti possit, exponamus. Febris cum purpura alba, quæ lymphæ valde vappescens & corruptæ soboles est, si in fine ad sociatur aliis acutis febribus, item variolis, morbillis, vel etiam in puerperio post lochia suppressa accedit, nunquam expers periculi est; necat autem ut plurimum per inflammationem interiorum partium, præsertim ventriculi & intestinorum. Funestum indicium est, si æstum præcordiorum summamque anxietatem internus frigoris sensus cum pulsu parvo, debili, inæquali excipiat, purpura dispareat, animi defectio, mens turbata & spiratio difficilis sit. Variolæ si statim primis diebus cum gravi dolore lumborum & delirio invadunt, & mox secundo die exanthemata in cute apparent aspera instar purpuræ cum maculis, & die quinto & sexto post plenam eruptionem pulsus non sedator fit, sed in eadem celeritate permanet & totum corpus pustulis obsitum est, raro in juvenili ætate evasisse quenquam scio. Ardentissimus vero circa nonum diem ex exulceratione manuum dolor omnia statim, quæ spem salutis facere videntur, saepè immutat: nam vehementissimus ille & æstuosus dolor, universum genus

ner-

251.

nervosum spasmis afficiens, summas parit anxietates, jactationes corporis, pustularum subsidentiam, postea respiratio difficilis, mentis turbatio, convulsio & pulsus parvus languidus supervenientes brevi interficiunt.

§. XX.

Quicunque a veneno vel validissimo emetico aut purgante sumto moriuntur, hos identidem inflammatio sphacelosa e medio tollit, dissectorum anatome id testante. Mortis vero futurae præsagia sunt, si ardore internos & summas anxietates pulsus valde parvus & inæqualis vel plane deficiens lequitur, cum sudore frigido, delirio & convulsione, quam a medicamento purgante concitatam ipse *Hippocratis S.VII.aph.25.* & multis aliis in locis mortiferam pronuntiat. Qui ex dolore a calculo vita decedunt, in iis plerumque inflammatio lethalis ventriculi & meningum supervenit. Nam si vomitum & acutissimum dolorem febris sequitur cum magna anxietate & siti vehemens, postea accedit singultus & delirium cum extremorum frigore, non diu superstes æger erit; in cholera si acuti dolores & tortiones incident supra infraque magno impetu humores prælertim virides prorumpunt, & ingens afficit bibendi cupiditas & facies flavescit, pallida fit, pulsusque parvus atque concisus est, non sine periculo morbus est. Si vero pulsus quoque totus concidit & crura contrahuntur frigidæque sudationes fiunt animaque deficit, inflammationem in sphacelum transisse non leve indicium est. Dysenteria si post alium morbum homine jam infirmo oritur, raro æger servatur, facilis e-

D 3

nim

nim est tunc transitus inflammationis in sphacelum. Peñsum adeoque sphaceli indicium est, si tormina acuta subito cessant & æger refrigeratur summaque adest virium prostratio. Singultus, cardialgia, præcordiorum æstus atque anxietas summa utplurimum præcedunt & perniciale ventriculi inflammationem indicant. In passione iliaca, ubi acutissimi sunt dolores cum contumaci alvi constrictione & vomitu assiduo etiam male olente, si singultus, delirium, gelidus sudor, extre morum frigus, nervorum distentio accedit, omnia certissimæ mortis nuncia sunt, id quod jam dudum observavit Hippocrates Secl. VII. aph. 10. dum ait: ab ileo vomitus, singultus, convulsio aut delirium malum. Eodem modo etiam atrocissima & convulsiva colica necat. Tam acerbus sæpen numero dolor in intestino recto a stagnante sanguine hæmorrhoidali urget atque affigit, ut non modo inflammatio, sed & lethalis sphacelatio hoc intestinum occupet, sub qua excrementa prodeunt foetidissima propter putredinem intestini, pulsus frequens & debilis cum summa sequitur virium prostratione & ipse sphacelus sæpius ad partes externas atque scrotum serpit, animi defectio tandem & brevi post mors ipsa succedunt.

§. XXI.

Plures in partu vel post eum itemque in puerperio mori fœminas notissimum est. Quare etiam de funestis mortis indiciis ac præsagiis quædam dicenda sunt. Si mulier vel propter pravum situm infantis, præsertim grandioris, continuis spasmis, doloribus ac laboribus per

per aliquot dies assiduis atque ardoribus simul junctis internis vehementibus, quos pulsuum celeritas ostendit, mirum defatigata est, accidit saepius, ut in partu vel etiam post eum repente dejectis viribus in animi forte deliquium vel affectum apoplexiæ similem propter pulsus præsentiam incident, & nulla arte vel ope vires & vitam recipere possint. Mortis indicium est, si affectus ad aliquot horas perdurat, neque penetrantissima medicina, qualis est spiritus salis ammoniaci cum calce viva paratus & oleo rutaæ essentificatus, in nares intrusa, excitari possunt. Si facies ipso in paroxysmo colorata manet, indicium est, sanguinem, ex vehementioribus spasmodis nimio impetu ad cerebrum delatum, hoc malum apoplectico per omnia simile produxit, & plerumque post obitum ex ore & naribus serum sanguineum foetidum effluit. Si parturientes foetu adhuc in utero mortuo exspirant, saepius ille post mortem ob jam nimis relaxatas vias & interiore fermentativum motum foras ex utero propellitur. Quæ in puerperio è vita discedunt foeminæ, eæ ut plurimum ex retento impuro sanguine, qui post partum ex utero salutariter aliquot dies prodire solet, graves dolores patiuntur, quos si non excipit effusio lochialis sanguinis, sed fluxus magis stipatur, uteri plerumque inflammatio & febris sequitur valde exitiosa. Illam incendum ab inferioribus locis usque ad cordis regionem vergens testatur, sique magna anxietas, virium prostatio, inquietudo & omnis appetitus dejectio jungitur, postea sensus internus frigoris cum horrore accedit, ac pulsus frequens

quens, parvus ac debilis jungitur, & visus incipit obfuscari, in propinquuo mortem ex sphacelo esse haec significant. Plurimæ ex puerperis integra mente mori solent, nam haec antea turbata paucis tæpe ante mortem horis ad se revertitur, ut imperitiores rem penitus in vado esse sibi perfaudeant. Sed ex pulsu moribundo prudentiores proximi exitii indicium desumunt. Si quando ob nimiam sanguinis post partum & in puerperio profusionem latus cum pulsu frequenti & debili calor assidue urget, neque etiam post somnum mane sedatur, & juncta est plenaria inappetentia viriumque dejectio, circa exitum puerperi, i. e. sexta septima na, syncoptica mors plerumque succedit.

§. XXII.

Cancro exulcerato nemo facile servatur propter summam corruptionem, quam sanies nigra, tenuis, odore abominabilis testatur; lenta est febris & vires indiges decrescunt, somnus anxius, laboriosus vel nullus, donec tandem animi defectio & mors sequantur. Accidit interdum, ut inflammations in exterioribus partibus consistentes, ejus generis sunt erysipelata, podagra, chiragra, retrocedant atque ad interiora pellantur, ac cito hominem rapiant. Neque vero id aliter fit, quam in inflammatione & sphacelatione ventriculi aut intestinorum. Major pernicies est, si in peste carbunculi vel bubones retrocedunt vel non satis prodeunt: nam tunc in certo vita periculo homo versatur. Horrore enim homo concutitur, summe anxius & inquietus fit, æstus cum exterioribus algescientibus regionem ventriculi occupat,

cupat, ad vomendum est cupiditas, vel etiam singultus accidit, postea sub mentis turbatione & syncope homo exspirat. Si quis ex nimia sanguinis profusione, quale quid contingere potest in infelici abortu, in hæmoptysi, in cruento vomitu, vel morbo nigro Hippocratis aut gravi hæmorrhagia in febribus moritur, is quidem ex animi defectione ipsaque syncope vitam amittit, sed tamen notabile est, quod plerumque vehemens sitis, inclinatio ad vomitum & pulsus cum debilitate, frequenter, cum artuum distensione præcedat, indicio, languorem in partibus interioribus, ventriculo, capite subsistentem movere adhuc quosdam spasmos; nam sitis ex spastica stricture tunicæ glandulosæ œsophagi utplurimum oritur. Morbi, quibus infantes pereunt, sunt ut plurimum spasmodici & convulsivi, inflammationem & sphacelum prælertim ventriculi, intestinorum aut capitidis, post se trahentes; nam ex acutis doloribus facile in epilepsiam & convulsiones, febres, atque asthmatum incident. Si epilepticus paroxysmus unus alterum consequitur, & alvus antea fortiter clausa sponte jam dimittit excrements valde foetida & nigra, vox clangosa & singultuosa fit, totumque corpus ardet, in propinquuo exitium esse judicare licet.

§. XXIII.

Restat jam, ut mortis præfigia in quibusdam etiam morbis chronicis exponamus. Hos inter vero eminent maxime hydrops, cachexia, scorbutus, marasmus, hectica, phthisis actabes. Qui hisce decumbunt, lente transeunt ad mortem propter lentius procedentem vi-

E

scerum

scerum ex humorum stagnatione, extravasatione corruptionem, quæ, quoniam nulla arte averti potest, certe mortem ingenerat. Indicia vero viscerum corruptorum in inferiori ventre adeoque mortis secuturæ sunt appetitus in totum prostratus cum eorum etiam aversione, quibus sani valde delectati fuerunt. Deinde lenita febris si incrementa sumit & celerior pulsus evadit, qui nunquam non corruptionem internam indicat. Denique lumma virium cum respiratione diffici prostratio, somnus valde laboriosus & plus debilitans, quam reficiens. Hæc si diutius adfligunt & nullis remediis mitescunt, certo mortem præfigunt, maxime si corpora sunt senilia vel ex morbo præcedente in ejusmodi chronicam passionem delapſa. Hæc sunt quædam communes & exitiales chronicorum notæ : non alienum vero erit, quasdam in certis morbis specialiores adjicere. Itaque quod attinet ad phthisin, pessima & mortem indicantia signa sunt, si totum corpus tabe consumptum est, si assidua atque hectica febris urget, facie rubicunda, si profuit alvus, sudor colliquativus est sique pedes intumescunt, si sputum suppressum, pallide ungues fiunt, oculique concavi & nares acutæ. Si ex asthmate diurno cordisque palpitatione vel ex induratione hepatis post quartanam hydrops sequitur, non facile fervari posse hominem certo pronuntiari potest, sique urina pauca, turbida, rubra redditur, omen est valde perniciosum, sique superiora gracilescunt, & facies insimul flavescit, præfigire mortem aliquot menses antequam accedat, haud dubiose licet, quæ etiam certis-

254.

tissime sequitur, febre aucta & respiratione difficiliori reddit. Quicunque saepius & maxime ex motu corporis & animi vehementiori fortem & contumacem palpitationem cordis sentiunt, & postea asthma convulsivum vel hæmoptysin aut hydropem incurunt, iis diu ante mortale periculum præsigiri potest, multoque magis, si quandoque animo delinquunt. Nam horum omnium causa polyposa in cordis vasis concretio est, quæ nulla medicina tolli potest, & tandem hos morbos concursantibus aliis causis funestos ingenerat, siue subito & sine causa manifesta & frequenter incidit animi deliquium, identidem causa ejusmodi polypus est & sollet mortem, si frequenter incidit, repentinam inferre. Quisquis enim saepe multumque sine evidenti occasione animo deficit, hunc reele *Hippocrates* innuit subito mori consueuisse.

§. XXIV.

Si hepar corruptio sphacelosa & mortalisa occupat, tum fastidium adeat cibi, maximeque carnis, frequens & multa est sitis, febris, virium dejectio, singultus & vomitu subinde extunditur serum vel flava bilis & corpus sensim contabescit. Ejusmodi in casibus post mortem observavi jecur plane sphacelosum, nigrum. Ventriculi exulceratio longum etiam & lethalem morbum producit, & cognoscitur, si summa anxietas & vomitus cibum adsumptum excipit, quæ vitia augescunt dato medicamento quodam acri salino aut spirituolo, corpus contabescit, pulsus semper celer est, extrema partium rigent & quandoque horrent, fonticuli clauduntur, so-

mnus parvus & laboriosus. Hi tertio vel quarto mense demum moriuntur & diu ante præsagium mortis fieri potest. In cachexia si totum corpus sit tumidum, inflatum, pallidum, si ciborum adest fastidium & crebrior male olens vomitus urget, & pauca per alvum ferruntur, urina cruda & pauca, respiratio difficilis & totum corpus male olet, postea si frequens pulsus accedit & respiratio difficilis, mortem aliquot mensibus prænuntiare licebit, quæ eo certius sequitur, quo ægrotus mœjora errata in diæta, in nimio potu commisit, vel mœstitia animi diuturna fatigatus fuit.

§. XXV.

His jam expositis è re esse duco, quædam adhuc eximia ac salutaria præcepta & monita ad prognosin instituendam subjungere, quæ inter maxime eminet illud, quod probe distingui debeant morbi spasmmodici chronicæ a passionibus acutis. Nam sæpiissime in hypochondriacis & hystericis ejusmodi pathemata occurunt, quæ in acutis passionibus lethalem effectum denunciant, in illis vero minus periculi alunt. Quid enim frequentius est, quam quod sub paroxysmis maximæ anxietates spirandique angustias cum extremorum frigore, urina aquosa, patiantur, pulsu existente parvo, debili, sæpiusque animi vehemens deliquium accedat, quæ tamen omnia brevi exspirant & sine periculo transiunt. Deinde probe sunt distinguenda morborum tempora; nam ex iis omnibus signis, quæ modo attulimus, funetis si quædam vel etiam plura sub initio & primis morbi diebus apparent, inconsiderate certe ageant,

255

rent, qui statim mortem præ foribus esse exinde judicare vellent. Aliud vero est, si viribus a nimio calore, vigilia assidua, inappetentia, anxietate, dolore per plures dies fractis & exhaustis funesti ejusmodi spasmi & ab iis oriunda symptomata prodeant, maximeque iis temporibus, ubi morbus alias salutariter solvi solet, quod ordinario fit circa dies impares, septimum, nonum & undecimum. Postea magna semper est habenda ratio corporum, quæ ægrotant, & maxime æstimandum, utrum ex imbecillibus an robustis sint; nam illa semper magis periclitantur, quam quæ constitutionis sunt robustioris & validioris. Imbecillibus vero ratione etatis senes & infantes, ratione corporis structuræ, qui spongiosi, repleti multisque & exilibus vasibus instructi sunt, annumeramus, neque minus, qui a parentibus debilibus ac morbosis procreati sunt, it. qui præcedente morbo diurno, vel immodecis sanguinis profusionibus ac diuturna inedia, vel animi affectu, mœstitia & cura, inquieta meditatione vires amiserunt. Referimus huc etiam puereras, & qui ex vitiosa diæta vitæque regimine & excretionibus suppressis ingentem impurorum humorum copiam intra vasa sibi contraxerunt. Nam in iis omnibus invalidis corporibus facile dolorum vel inflammationum ad mortiferum sphacelum transitus est. Postremo etiam illud adjiciendum puto, ut probe semper attendamus, num à causis quibusdam nocentibus, externis, per iram, terrorum, corporis refrigerationem, aut cibum perniciosem, vel per medicamentum vehemens & virulentæ in-

E 3

dolis

dolis suscitata fuerint, quæ apparent, symptomata. Quæ omnia ita etiam sunt comparata, ut in morbis in se periculosis & corporibus invalidis in mortalem perniciem ægros conjicere mortemque accelerare possint. Si tamen in morbo minus periculoſo & corpore robusto pernicialia ejusmodi symptomata apparent, non statim penitus extimescenda sunt. Postremo plurimum etiam refert ad prognosin feliciter iastituendam principia morbi invadentis probe expendere. Nam omnis morbus, qui statim in principio vires tollit, pulsus valde frequenti existente, nihil boni portendit, eo quod & infirmiores vires & succorum impuritatem & pravam dyscrasiam sanguinis clarius manifestet, sed hæc de nobilissima hac materia dixisse satis erit,



Mat-

256.

MATTHIÆ per Anagr. AIT THEMA!

DOCTUS AIT DOCTUM MATTHIÆ THEMA;
quid inde?

DOCTORES ajunt: DOCTOR IN ARTE SUA EST.
Gratulor hinc NATO docto, doctoque PARENTI,
Et precor, ut vivat DOCTOR UTERQUE
diu.

*Paucis bise Per - Eximio Domino Re-
spondenti ejusque Reverendo Paren-
ti, Confratri, Compatri, Vicino ac
Amico suo sincero, ex animo congra-
tulari voluit:*

Johann Georg Schadorff /
Pastor Bagoviensis & Riwendensis.

Se Welt ist nach dem Fall ein Lazareth zu nennen,
Da iede Stadt und Haß nun Patienten hat!
Der Vigoreufeste muß doch von sich bekennen,
Sein Geist sey schwach, ja tod, sein Leib sey krank
und matt.
Dem Geist ist ein Recept im Paradies verschrieben,
Auch nach geraumer Zeit ganz sicher präparirt,
Dag.

Davon auch der Effect noch niemahls ausgeblieben,

Wenn es von Medicis ist kluglich applicirt.

Dem Leibe ward die Welt zur Officin gegeben,

Da das, was wächst und lebt, sehr klug rangiret
steht.

Dem, was an Mineris wir aus der Erden heben,

An Medicinscher Krafft und Wirkung noch vor-
geht.

Ob nun die Species im Fluche eingeschlossen,

So werden sie durchs Licht des Phœbi digerirt.

Da dieser Laborant umsonst und unverdrossen

Durch distilliren es finirt und maturirt.

Und wo dann die Natur aufhört zu laboriren,

Da setzt der Mensch es fort, den hier Sophia lehrt,

Durch des Vulcani Kunst den Fluch zu separiren,

Da er den ärtesten Gifft in Medicin verkehrt.

Wer nun Sophiam hat zur Führerin genommen,

Der hats in der Chymie für andre weit gebracht:

Und wird den Titul nicht unwürdig überkommen,

Wenn eine Facultät ihm solchen zugesucht.

Drum muss ich billig Ihm, Herr Bruder/ gratuliren,

Und füge diesen Wunsch zum Trost der Kranken
bey:

Sophia wolle Ihn in Theoria führen/
Dass in der Praxi auch viel Glück und Se-
gen sey.

Mit diesem wenigen Strophen hat dem Hrn. Bruder bey
Erlangung der Doctor-Würde schuldigst gratu-
tiren wollen,

Johann George Berger/
Pastor zu Bamme und Gräningen.

33 (o) 33

ls ausgeblieben,
lich applicirt.
ein gegeben,
sehr klug rangiret

Erden heben,
Bürfung noch vor-

chlossen,
s Phœbi digerirt.
verdrossen
maturirt.
u laboriren,
en hier Sophia lehrt,
y zu separiren,
edicin verkehrt.
in genommen,
ndre weit gebracht:
g überkommen,
en zugedacht.
Bruder/ gratuliren,
Trost der Kranken

führen /
Glück und Sc-

en hat dem Hrn. Bruder bey
or-Würde schuldigst gratu-

George Berger/
Bamme und Gräninger.

TIFFEN® Color Control Patches

